

Vedlegg til kongelig resolusjon 13. februar 2026 Forskrift om vern av Ytre Hardangerfjorden marine verneområde

## **Forskrift om vern av Ytre Hardangerfjorden marine verneområde i Tysnes, Stord, og Kvinnherad kommunar, Vestland**

Fastsett ved kongeleg resolusjon 13. februar 2026 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34, jf. § 39 og § 62. Fremja av Klima- og miljødepartementet.

### **§ 1. Føremål**

Føremålet med Ytre Hardangerfjorden marine verneområde er å ta vare på eit spesielt og djupt kystområde med særeigne naturforhald der ein stor undersjøisk morenerygg og sterk straum gir gode tilhøve for eit rikt og mangfaldig dyreliv med mellom anna førekomstar av korallar og svampar, store førekomstar av fjørstjerna lofotsjølilje *Rhizocrinus lofotensis*, og den sjeldne hornkorallen *Isidella lofotensis*, samt mykje av brislingbestanden i Hardangerfjorden i delar av året, eit regionalt viktig gytefelt for torsk og viktige oppvekst- og beiteområde for kysttorsk. Det er ei målsetjing å behalde verneverdiane utan større grad av ytre påverknad, og området skal kunne tene som referanseområde for forskning og overvaking.

Verneføremålet knyter seg til vassøyla og sjøbotnen.

### **§ 2. Geografisk avgrensing**

Grensene for det marine verneområdet går fram av vedlagte kart datert Klima- og miljødepartementet februar 2026.

Det marine verneområdet dekker et sjøareal på omlag 67,8 km<sup>2</sup> i Tysnes, Stord og Kvinnherad kommunar med grense mot land langs djupnekote 2 m under sjøkartnull.

Verneområdet femner om overflata, vass-søyla og sjøbotnen.

### **§ 3. Vernereglar**

I det marine verneområdet må ingen setje i verk noko som skader verneverdiane nemnt i verneføremålet. Følgjande vernereglar gjeld:

- a) Vegetasjonen, medrekna tang, tare og andre marine planter, er verna mot skade og øydelegging. Planting av vegetasjon er forbode.
- b) Dyrelivet i sjø er verna mot skade og øydelegging. Utsetjing av organismar er forbode.
- c) Området er verna mot tiltak og inngrep som kan skade verneverdiane som t.d. etablering av ulike typar anlegg, utfylling, byggeverksemd, plassering av konstruksjonar på sjøbotnen, andre varige eller midlertidige innretningar, legging av røyrleidningar og kablar, utføring av avløpsvatn og andre konsentrerte tilførsler av ureining, mudring, uttak og deponering av masse, sprenging, boring, utslepp av kjølevatn frå land, omrøyring av vassmassar og oppankring. Forsøpling er forbode.

### **§ 4. Generelle unntak frå vernereglane**

Vernereglane i § 3 er ikkje til hinder for:

- a) gjennomføring av militær operativ verksemd og tiltak i samband med ambulanse-, politi-, brannvern-, oljevern-, rednings- og oppsynsverksemd (ikkje øvingsverksemd), samt gjennomføring av skjøtsel eller forvaltingsoppgåver som er bestemt av forvaltingsstyresmakta
- b) oppankring mot land, fortøying av småbåt, og anlegg av fortøyingsfeste medrekna fastfortøying, dragfortøying og oppankring mot landfeste for låssetjing av fisk, der fortøyingsmiddel på faste fortøyingar må være i stein eller anna materiale som ikkje forureinar
- c) hausting av viltlevande marine ressursar i samsvar med havressurslova og andre lover og forskrifter, med unntak for hausting av vegetasjon, medrekna tang, tare og andre marine planter.
- d) tradisjonell låssetjing av fisk
- e) fiske i samsvar med lakse- og innlandsfiskloven
- f) jakt og fangst i samsvar med andre lover og forskrifter
- g) ferdsel med båt eller andre fartøy
- h) drift og vedlikehald av eksisterande sjømerke og andre navigasjonsinstallasjonar
- i) drift og vedlikehald av eksisterande sjøkablar og naudsynte reparasjonar ved akutt utfall
- j) drift og vedlikehald av andre eksisterande anlegg og innretningar, medrekna akvakulturanlegg, avløpsanlegg, vegar, bruer, brygger, moloar, båtstøer og båthus
- k) oppgradering og fornying av eksisterande sjøkablar for å heve spenningsnivå og auke linetverrsnitt når dette ikkje føreset vesentlege fysiske endringar som ikkje er i samsvar med verneføremålet

## **§ 5. Spesifiserte dispensasjonsreglar**

Forvaltingsstyresmakta kan etter søknad gje dispensasjon til:

- a) oppføring av naudsynte navigasjonsinstallasjonar og andre farleistiltak for å trygge ferdsle til sjøs
- b) legging av kablar og røyrleidningar og så langt som mogleg samla i korridorar
- c) oppgradering/fornyng av sjøkablar som ikkje fell inn under § 4
- d) tilretteleggingstiltak for friluftsliv
- e) småbåthamner medrekna m.a. flytebrygger og fortøyingar
- f) tekniske tiltak som inneberer små inngrep på botnen og som ikkje påverkar dei marine verneverdiane inkl. vassutskifting og straumforhold nemneverdig
- g) vedlikehaldsmudring
- h) istandsetting, skjøtsel og vedlikehald av kulturminne
- i) mindre uttak av sand til eige bruk for tilgrensande grunneigarar
- j) bølgedempingar i samband med småbåtanlegg
- k) akvakultur som ikkje er i strid med verneføremålet
- l) levandelagring av villfanga fisk inntil 12 veker
- m) uttak av framande, introduserte artar

## **§ 6. Generelle dispensasjonsreglar**

Forvaltingsstyresmakta kan gjere unntak frå forskrifta dersom det ikkje er i strid mot føremålet til vernevedtaket og ikkje kan påverka verneverdiane nemneverdig, eller dersom

tryggleikssyn eller omsyn til vesentlege samfunnsinteresser gjer det naudsynt, i samsvar med naturmangfoldloven § 48.

#### **§ 7. Skjøtsel**

Forvaltingsstyresmakta, eller den forvaltingsstyresmakta bestemmer, kan setje i verk tiltak for å oppretthalde eller oppnå naturtilstanden som er føremålet med vernet, i samsvar med naturmangfoldloven § 47.

#### **§ 8. Forvaltingsplan**

Forvaltingsstyresmakta skal utarbeide ein forvaltingsplan med nærare retningslinjer for forvalting og skjøtsel av det marine verneområdet. Forvaltingsplanen kan innehalde nærare retningslinjer for gjennomføring av skjøtsel.

#### **§ 9. Forvaltingsstyresmakt**

Statsforvaltaren i Vestland er forvaltingsstyresmakt etter forskrifta.

#### **§10. Rådgjevande utval**

Det kan opprettast eit rådgjevande utval for forvaltinga av verneområdet.

#### **§ 11. Iverksetting**

Denne forskrifta tek til å gjelde straks.